

**KRISTA TÂNA TUARIN**

**CHÂNGVAWN:** “Chutiang ti tûra koh chu in ni zâwk asin, Krista pawhin a tuarsak che u a, a hniak hnung in zui theih nân entawn tûr a hnutchhiah che u a ni,” (*1 Petera 2:21*, NKJV).

**SABBATH CHAWHNÛ**

**APRIL 29**

**Chhiar tûrte:** 2 Timothea 3:12; 1 Petera 1:6, 3:13–22; 4:12–14, 17–19; Thupuan 12:17.

**K**UM zabi pakhatna lai vêla Kristianten tihduhdahna an tawrh chanchin kha kan hre lâh hle a. Bible ngei pawh hian, a bîk takin Tirhkohte Thiltih bu phei hi chuan, kohhranin a hmachhawn tûr râphtlâk tak mai chu eng emaw chen min hmuh lâwktîr nghe nghe a. Peteran lehkha a thawn Kristiante nunah pawh hian tihduhdahna leh tawrhna chu a taka thil thleng mêk a ni.

A lekhathawn hmasa zâwk bung hmasa berah hian Petera chuan a lekhathawn lo chhiartute chu “Tûn hun rei lo tê chhông hian (a tûl a nih chuan) fiahna chi hrang hrang avângin in lungngai rih a; mei hmanga fiah tawh, mahse boral leh mai thei rangkachak âi pawha hlu daih zâwk in rinna dikzia chu Isua Krista lo inlâr hunah chuan fak leh chawimawi leh tihropui tûrin a lo lang chhuak dâwn a ni,” tiin a hrilh a (*1 Petera 1:6, 7*, NKJV). He a lekhathawn vêka a tâwp lamah pawh hian hetiang deuh tho hi a sawi leh baw: “Ni rei lo te chhông in

tuar hnuin, khawngaihna zawng zawng Pathian, Kristaa a chatuan ropuina chang tûra kotu che u ngei chuan a siam thain a tanpui che u ang a, tichakin a tinghet bawk dâwn che u a ni,” tiin (*1 Petera 5:10*, NRSV).

He lekhathawn tâwi tê-ah hian, a lekhathawn lo chhiartuten Krista tâna an tawrh ve a tûl thu sawina châng thui zet zet pathum âia tlêm lo a awm a (*1 Petera 2:18–25, 3:13–21, 4:12–19*). A sawi tam emaw, sawi tlêm emaw, eng pawh chu lo ni se, tihduhdahnain a thlen tawrhna chu Petera lekhathawn pakhatna thupui ber a ni tih a chiang a, chu lam chu kan hawi dâwn bawk a ni.

**SUNDAY**

**APRIL 30**

### **Kristiante hmasâte tihduhdahna**

**1 Petera 1:6, 5:10 chhiar la. Hetah hian eng thu nge Peteran a sawi a, engtin nge an thil hmachhawn mête chu chhâng lét tûrin a hrilh le?**

Kum zabi pakhatna aţanga pathumna inkâr chhûng vêl kha chuan Kristian nih hrim hrim avâng ngawt pawhin thihna râpthlâk tak tawh mai theih a ni a. Rome Lalber Trajan-a hnêna Pliny-an lekhka a thawn hian Kristian hmasate nunna dêrthâwn thinzia chu a tilang chiang hle. Hetih lai vêl (AD. 111–113) hian Pliny-a chu Pontus leh Bithynia ram governor a ni a, hêng ram pahnihte hi 1 Petera 1:1-ah pawh sawi lan a ni bawk.

Lalber Trajan-a hnênah hian Pliny-a chuan Kristian nia miin an puhte chung a chêt dân tûr chungchângah thurâwn pe tûrin a ngên a. Kristian nia insawite chu a thah vek tawh thu a sawi a. Hetih lai hian mi thênkhat chuan tûn hmâin Kristian an lo ni ve tawh thîn a; mahse tûnah chuan a nih tawh loh thu an sawi a ni âwm e. Chûng mîte chu Pliny-a hian Trajan-a limah leh pathian dang limahte rimtui hâl a, Isua Krista ânchhia lawhna hmanga Kristian a nih tawh lohzia tilang tûrin a hrilh thîn a. Rome lalram chhûngah khân lalber pawh ni se, la dam

lai reng chibai bûk chu tih ngai zen zen a ni lo. Mahse Petera lekhathawn lo chhiartute awmna Rome lalram chhûnga khawchhak lamah chuan phal a ni thung a; a châng phei chuan anmahni pual biak in (temple) din tûrin an khua leh tuite kha an fuih thîn nghe nghe a ni. Biak in thenkhat chuan puithiamte neiin, maichâmahte hâlral thilhlân an hlân thîn a. Pliny-an Kristiante chu Rome lalram laka an rinawmzia entfîr nâna rimtui a hâltîr a, an lalber lim chibai a bûktîr pawh hi Asia Minor ram vêla governor dangte pawhin an tih angin a ti ve mai a ni.

Kum zabi pakhatna lai vêl kha chuan Kristian nih hrim hrim ringawt pawh kha thil hlauhawm tak a ni a. A bîk takin Nero-a (AD. 54–68) leh Domitian-a (AD. 81–96) te lal lai phei kha chuan a hlauhawm zual hle.

Mahse, Petera lekhathawn pakhatnaa kan hmuh tihduhdahna hi chu ram pum huap ni lovin, khawi lai ram/khaw pakhat emaw-a thleng mai a nih hmêl. Tihduhdahna an tawrh a sawihote pawh hi a tê tham angreng viau bawk a, a sawi chhunte chu: sawichhiatna (*1 Petera 2:12*) te, deusawhna (*1 Petera 3:9*) te, leh hauhna (*1 Petera 4:14*) te a ni. Fiahna an tawrh te hi nasa viau hlawm tho mah se, lung ina tântîrna emaw, tihhlumna emaw êm chu a thlen rih lo niin a lang. Chutiang pawh chu lo ni se, kum zabi pakhatna lai vêl kha chuan Kristian nih hrim hrim kha a khawhar thlâk hle dâwn tih chu a chiang reng mai a, an thurin vawnte avâng khân tuar thei reng dinhmunah an ding bawk. Chuvâng chuan Petera pawhin a lekhathawnah hian a thil vei zâwnge chu a ziak tel ve a ni.

THAWHTANNÎ

MAY 1

## Hrehawm tawrhna leh Krista

**1 Petera 3:13–22 hi chhiar la. Engtin nge Kristiante hian an rinna avâng a tawrhna thlensaktute hi an chhân lêt ang? Isua tawrhate leh ringtuten an rinna avâng a hrehawm an tawrh te hian inzawmna eng nge an neih?**

Peteran, “Felna avânga in tuar a nih chuan, malsâwmin in awm tihna a ni” (*1 Petera 3:14*, NKJV) tih thu a sawi hian, a nihna taka chuan Isua thusawi, “Felna avânga tihduhdah tuarte chu an eng a thâwl e” (*Matthaia 5:10*) tih kha a rawn tuihnih a ni ber a. Kristiante chuan anmahni beitunge chu an hlau tûr a ni lo va, Krista chu an thinlungah LALPA a nihzia an hre hle zâwk tûr a ni (*1 Petera 3:15*). Chutianga an thinlunga Isua nihna an nemnggehna chuan amahni dotute hmachhawn thei tûrin huaisenna a pe dâwn a ni.

Kristiante chuan beisei an neih chhan chu engtik hunah pawh an sawifiah thei tûr a ni tiin a sawi baw a. Mahse chu chu mi dangte rilru hneh thei tûr zâwngin–inngaitlâwm tak leh [mi dangte] zah tak chungin – an sawi thîn tûr a ni thung (*1 Petera 3:15, 16*).

Kristiante chu miin an puh chhiat theihna tûrin engtin mah an awm lo tûr a ni baw a. Chhia leh tha hriatna thiang tak an nei reng tûr a ni (*1 Petera 3:16*). Hei hi a pawimawh khawp mai, a chhan chu eng ang pawhin puh ni mah se, an nunah sawisêl tûr pakhat mah a awm si loh chuan anmahni puhtute chu an zak zâwk dâwn si a.

Thil dik lo kan tih avânga kan tuar a nih chuan engmah lâwmman beisei theih kan nei lo (*1 Petera 3:17*). Thil tha, thil dik tih avânga tuarna chu a dang daih a ni: “Thil sual tih avânga tuar âi chua, Pathian rem tih zâwng a nih chuan, thil tha tih avânga tuar hi a tha zâwk a ni” tih a ni si a (*1 Petera 3:17*).

Petera hian Isua chu entawna nei tûrin a hrilh a. Krista pawh khân a felna avângin hrehawm a tuar a; a nun thianghlim tak mai kha amah hawtute tân chuan thil huathlala tak a ni. Thil dik lo ni lovin, thil dik a tih avângin a tuar a. Mahse a tawrhna chuan chhandamna kawng awm chhun a thlen hlah baw si.

Isua chu mi sualte thih âi a thî a (“mi fel chuan mi fel lo tuar âi a tuar a,” (*1 Petera 3:18*), chutichuan, amah ringtute chuan chatuana nunna thutiam chu an chang dâwn a ni. Thil

sual ni lovin, thil dik i tih avâng zâwkin hrehawm i lo tuar ve tawh thîn em? Chutianga i tawrhna aṭang chuan Kristian nih awmzia leh Krista nunchang lan chhuah tîr tih awmzia hi eng nge i lo zir chhuah ve le?

**THAWHLEHNÎ**

**MAY 2**

**Fiahna nasa tak chu**

**1 Petera 4:12–14 chhiar la. Eng vângin nge an chung a fiahna lo thleng chu mak ti vak lo tûrin a hrilh? 2 Timothea 3:12 leh Johana 15:18 te pawh en tel ang che.**

Petera hian Kristian nih avâng a hrehawm tawrhna chu Krista tawrhna ṭawmpui ve-na a nih thu chiang takin a sawi a. Thleng lo tûra ngaih tûr a nih loh thu a sawi baw. Paula pawhin heti hian a lo sawi ve a: “A ni, tu pawh Krista Isuaa Pathian ngaihsaka awm tum apiang chuan tihduhdahna te an tuar baw ang,” tiin (*2 Timothea 3:12*). Isua ngei pawh khân amah zuituten an hmachhawn tûr thilte a sawi a: “Chumi hunah chuan hrehawm tuar tûrin an mantîr ang che u a, an tihlum ang che u; ka hming avângin hnam zawng zawng huat in ni ang. Chumi hunah chuan mi tam tak an tlu ang a, an inmantîr tawn ang a, an inhaw tawn ang,” tiin (*Matthaia 24:9, 10*).

Ellen G. White-i chuan heti hian a lo ziak a: “Chutiang chuan Krista Isuaa Pathian ngaihsaka awm zawng zawng chuan an tuar ve ang. Krista Thlarau changtute chu tihduhdahna leh huatna chuan a hmuak reng a. Hun a danglam chhoh dân ang zêlin intihduhdah dân hmang pawh a danglam ve zêl thîn; mahse a nihphung—a tum bulpui ber—erawh chu a la ngai reng a, Abela hunlai aṭang tawh khân LALPA mi thlante chuan tihlum an lo tâwk zêl thîn a ni.”—*Tirhkohte Thiltih*, p. 576.

**Thupuan 12:17 chhiar la. He lai châng hian ni hnuhnûnga Kristianten tihduhdahna an tawrh ngei tûr thu engtin nge a sawi le?**

---

Kristian dik tak tân chuan tihduhdahna hi engtik hunah pawh a hnai reng a ni tih hi phat rual loha Chiang a ni a. Chu chu Petera pawhin a lehkhathawn lo chhiartute hnênah sawiin, “fiahna nasa tak” an hmachhawn mêk thu a hrilh a nih kha. Mei chuan thil a tihchhiat vek theih rualin, bawhlhawhte pawh a kâng fai vek thei tho bawk a. Mei kâng tuartu thil azirin mei hnathawh dân pawh a dang daih thei a ni. Inte hi meiin a tichhe thîn a; chutih laiin tangkarua leh rangkachak erawh chu a tithianghlim thîn thung. Tihduhdahna chu kan cho chhuak ngai tûr a nih loh rualin, Pathian chuan tihduhdahna a tângin thil tha tak a thur chhuar thei si. Chuvâng chuan Petera pawh hian a lehkhathawn lo chhiartute chu (keimahni pawh telin), “Ni e, tihduhdahna chu a tha lo rêng alâwm; mahse tihduhdahna avâng hian lungngai rêng rêng suh u. Hêngte hi thleng lo tûra beisei tûr a ni lo va. Rinnain hma lam pan tâng tâng zâwk ang che u,” tiin a (min) hrilh a ni.

**An rinna avânga hrehawm tuar mêkte dawm kâng a, fuih a, tanpui tûrin eng thil nge tih theih kan neih le?**

**NILAINÎ**

**MAY 3**

**Rorêlna leh Pathian mête**

**1 Petera 4:17–19 hi Isaia 10:11, 12 leh Malakia 3:1–6 te nêh hian khaikhin la. Thil thuhmun an sawi theuh chu eng nge ni?**

Hêng châng hrang hrangahte hian rorêlna chu Pathian mête-ah tan a nih tûr thu kan hmu theuh a. Petera phei hi chuan a lehkhathawn lo chhiatute tawrhate chu Pathian rorêlna nêh inzawm tlat niin a sawi nghe nghe. A ngaihdân chuan, a lehkhathawn lo chhiartu Kristiante tawrhna chu Pathian chhângte-a tan tûr Pathian rorêlna âia nêp chuang bîk lo a ni a. “Chuvângin, Pathian remtih zâwng anga tuarte chuan thil tha tiin an thlaraute chu Siamtu rinawm tak hnênah kawltîr rawh se” tiin a sawi (*1 Petera 4:19*).

**Luka 18:1–8 chhiar la. Engtin nge he thu hian Pathian rorêlna hrethiam thei tûrin min puih le?**

Bible hunlai chuan rorêlna hi an thil nghahhlelh ber pakhat a ni thîn a. Luka 18:1–8-a hmeithai rethei tak chanchin hian rorêlna chungchânga an ngaihdân chu a lantîr Chiang angreng viau a ni. He hmeithai hian a thusawi ngaihthlâksaktu tûr rorêltu a neih chauhin thiam a chang dâwn a ni tih a hria a. Mahse sum a nei tam loh avâng leh hmeithai mai a nih bawk si avângin rorêltu pawhin rei fê chhûng chu a ngaihsak duh lo va. Mahse a tâwp a tâwpah chuan a ngaihsak ta nge nge a, a phû ang ngeiin phubâ pawh a lâksak ta a nih kha. Heti hian Isua chuan a sawi bawk: “An chungah zâi dawh rih mah sela, a mi thlan, a chhûn a zâna amah kotute phubâ chu Pathianin a lâksak lo vang em ni?” tiin (*Luka 18:7*). Sual chuan khawvêlah hian thil tha lo a rawn thlen a, hmâsâng ata tawh tûnlai thleng hian Pathian mîte chuan Pathianin thil a siam that leh hun tûr chu nghâkhlel takin an lo thlîr thîn a ni.

“AW LALPA Pathian, tu nge i hming zah lo vang a, chawimâwi lo vang? Nang chauh i thianghlim si; i thiltih felte chu tihlan a nih tawh avângin hnam tinrêngin chibai an rawn bûk ang che,” (*Thupuan 15:4*).

**Hremna tâwk si lo va mi sual lo awm tawh zawng zawngte leh la awm mêkte hi thlîr la. Eng vângin nge dikna leh Pathian rorêlna fel tak chu keini Kristiante tân hian a pawimawh êm êm? Rorêlna a thleng ngei dâwn a ni tih thutiam aţang hian eng ang beiseina nge i lo chhar chhuah ve le?**

**NINGANĪ**  
**Fiahna kêra rinna**

**MAY 4**

Kan hmuh tâk angin, Petera hian a lehkhathawn hi an rinna avânga hrehawm tuar mêk ringtute lo chhiar atâna a ziah a ni a. Kristian kohhran chanchin kal tawhin a târlan angin atân

khân kum rei vak lo chhông chu thil a harsa ve takzet a ni. Kristiante zînga tam tak chuan hêng Petera thuziakahte hian inhnemna leh thlamuanna an lo chhar tawh thîn a. A la chhâr mêk zêl bawk.

Eng vângin nge tawrhna hi a lo thlen thîn? Hei hi chu hmasâng ata tawh zawhna awm reng a ni. Bible-a lehkhate zînga ziah hmasak ber pakhat Joba bu chuan tawrhna chungchâng hi a sawi nasa hle mai a. Isua tih loh mi dang, “tualthatu a nih avângin emaw, rûkru a nih avângin emaw, thil tisualtu a nih avângin emaw, mi dang thiltih rêlsaktu a nih avângin emaw pawh ni lova” tuar an awm a nih ngai chuan, chu mi chu tu dang ni lovin Joba kha a ni ngei ang (*1 Petera 4:15*). Pathian meuh pawhin Joba chungchâng kha hetiang hian a sawi a: “Ka chhiahhlawh Joba hi i ngaihtuah ngai em? Lei chungah hian amah anga famkim, mi ngîl, Pathian tîh mi, thil tha lo laka insûm thei mi tu mah an awm lo asin!” tiin (*Joba 1:8*). Mahse, mi khawngaihthlâk tak Joba a tawrh zozaite kha han ngaihtuah teh. Khângte kha a sual vâng ni lovin, a fel vâng zâwka tuar a ni lehngâl a.

**Hêng Bible chângte hian tawrhna lo awmna chhan hre thei tûrin engtin nge min puih hlawm le? 1 Petera 5:8, Thupuan 12:9, Thupuan 2:10.**

A tâwi thei ang bera chhân chuan, hrehawm kan tawrhna chhan hi chu Krista leh Setana indona kêra awm kan nih vâng a ni a. Hei hi tehkhin thu, kan nihphunga sual leh tha a awm kawp thu sawina satliah mai a ni lo. Mihringte neitu zâwk nih inchuhin Setana tak tak leh Isua tak tak an indo mêk a ni.

**1 Petera 4:19 chhiar la. Petera thil sawi hian tûna kan hrehawm tawrh mêkah hian engtin nge min tanpui theih ang?**

Hrehawm kan tawrh châng hian, a bîk takin kan hrehawm tawrh chu keimahni thil tih dik lohin a rah chhuah a nih loh



pehi chuan, Joban zawhna a zawh ang hi kan zâwt ve ðhîn tlângpui a: Eng vâng nge? kan ti ðhîn. Mahse a chhâna erawh kan dawng ngai chuang bawk si lo. Peteran a lo sawi ang hian, hrehawm kan tawrh laia kan tih theih awm chhun chu Pathian hnêna inngah tawp mai a ni a, amah Siamtu rinawm tak chu ringin thil ðha ti chhunzawm zêl tûr kan ni bawk (*1 Petera 4:19*).

**Eng vângin nge Pathian nungchang, a ðhatna leh a hmangaihna te mahni ngeiina hriat chu hrehawm tuar mêk Kristiante tân a pawimawh viau le? Engtin nge kan zavai hian Pathian chu kan lo hriat ang a, Chiang zâwka a hmangaihna kan lo hriatthiam theih ang?**

**ZIRTÂWPNÎ**

**MAY 5**

**Ngaihtuah zui tûr:** Sunday zirlai khân Kristianten tihduhdahna an hmachhawn chungchâng a sawi a. Hei hi kum zabi 1-na leh 2-na chho vêla Kristianten tihduhdahna an tawrh chungchâng Rome lalber hnêna Pliny-a'n a hrilhna lehkhâa a inziak Mizo ðawng lehlin a ni a: “Kristian nia an sawi ka tih dân chu hetiang hi a ni: Kristian an ni tak tak nge ni tak tak lo tih ka zâwt a; an nih thu an sawi a nih chuan tihhlum an nih tûr thu hrilhin vawi hnih ka zâwt nawn leh a; an la dawl lo fo a nih chuan, tihhlum tûrin thu ka pe tawh mai ðhîn a ni. An thurin/thuvawn chu eng pawh lo ni se, an luhlul leh ngawltâwt êm avâng hi chuan hrem an phû ve rêng rêngin ka hria.

Kristian an ni tih phattu leh an lo ni tawh ðhîn a, mahse tânah chuan ni tawh lova insawi, ka thupêk anga kan pathiante hnêna ðawngtaina hlân a, i lim hmâa uain leh beraw rintang hlân a, a tâwpa Krista ânchhia lawh tate chu—Kristian dik takte chu hêng thilte hi tih luihtîr theih an ni bau lo nia sawi a ni a—chhuah tûr niin ka hre bawk. Mi dang, enthlaturen Kristian an ni tia min hrilhte pawhin a tîrah chuan Kristian an nih thu an puang a; mahse a hnu-ah an rinna chu an phat leh ðhîn. Ni e, Kristian chu an lo ni tawh ðhîn ngei alâwm; mahse kum thum

liam ta te, kum tam tak liam ta te, leh kum rei vak lo liam ta te khân an lo bânsan leh tawh a. An zavaî hian nangma lim leh kan pathiante lim chu chibai bûkin, Krista chu ânchhia an lawh thung a ni.”—*Pliny Letters* (London: William Heinemann, 1915), book 10:96 (vol. 2, pp. 401–403).

### **Sawi ho tûrte:**

- ❶ A chungá Pliny-a lekhathawna kan hmuh ang hian khatih hunlaia Kristiante thil hmachhawn lian ber chu eng nge ni? Kha an thil tawn kha Thupuan 14:9–12-a kan hmuh vântirhkoh pathumna-in ni hnahnûnga thil thleng tûr a sawi nêh hian eng nge inanna a neih? Hei hian indona ropui thleng mêka Krista leh Setana te thu inchuh engte nge min hrilh le?
- ❷ “Pathian dân châwisângtute chu khawvêla Pathian rorêlna thlentu nia puh an ni a, leilunga chhiatna lo thlen chhanah leh, khawvêl mihringte zînga innghirngghona leh thisen chhuahna thlen chhanah ngaih an ni bawk. Vaukhâna hnahnûng berin a kalpui thiltihtheihna chuan mi sualte chu a tithinur a, thuchah pawmtu zawng zawng chu an pâwng huat vek tawp mai a, Setana lah chuan huatna rilru tihsosân leh tihduhdahna tihhluar zêl chu a la tum ruh hle bawk a ni.”—Ellen G. White, *Indona Ropui*, pp. 614, 615. Hei hi engtikah nge a lo thlen dân tih hre lo mah ila, engtin nge kan rinna dodâlna chu, eng ang chî pawh ni se, hmachhawn tûrin kan inpeih reng theih ang? Inpeih renga awm tûra thil pawimawh tak chu eng nge ni?

\* \* \*